

**Uniu da commerci e professiun  
Disentis/Mustér**

**Statuts**

# Statuts dall'Uniun da commerci e professiun Mustér

## I. Num, sedia ed intent

### Art. 1

Sut il num "Uniun da commerci e professiun Mustér", numnau sequent "UCP", exista cun sedia sigl intschesch dalla vischnaunca da Mustér in'uniun el senn d'art. 60 ss dil cudisch civil svizzer.

### Art. 2

L'UCP ha per intent la tgira e la promoziun dils interess commercials e professiunals da ses commembers sco era dalla communitad.

En special ha l'UCP ils suandonts pensums:

- a) unir tuts representants da commerci e professiun da Mustér;
- b) susteniment da tuttas stentas, las qualas surveschan ad in sanadeivel svilup economic dalla vischnaunca e dalla regiun;
- c) tgira dils interess da professiun indigena viers las autoritads e la publicitad;
- d) prender posiziun tier damondas economicas, politicas ed autras, las qualas tangheschan la vischnaunca e la regiun ni ils interess comunabels dils commembers dall'UCP;
- e) cumbatter la concorrenza illoiala da scadin'uisa ;
- f) informar ils commembers sur d'impurtontas damondas economicas e politicas;
- g) tgira e promoziun d'interess professiunals dallas clamadas ch'appartegnan all'UCP ;
- h) promoziun digl agid professiunel propri;
- i) promoziun dalla scolaziun professiunala;
- j) promoziun dalla collaboraziun cun las autras uniuns da commerci sin plaun regional e surregional.

### Art. 3

L'UCP ei ina secziun dall'uniun professiunala grischuna.

## II. Commembradi

### Art. 4

Commembers dall'uniun san esser:

- a) personas naturalas e giuridicas ord commerci, industria e menaschis da prestaziun da survetsch cun domicil ni sedia da fatschenta ella vischnaunca da Mustér ni el direct contuorn;
- b) personas, firmas ed organisaziuns che stattan datier dil commerci e handletg

Fatschentas vegnan per regla representadas entras il meinafatschenta.

---

**Art. 5**

Gener da commembradi

**5.1 Commember A:**

Commembers ch'appartegnan cumpleinamein all'UCP Disentis/Mustér sco era ad autras uniuns surordinadas.

**5.2 Commember B:**

Commembers che appartegnan sulettamein all'UCP Disentis/Mustér.

**5.3 Commember d'honor:**

Persunas ch'èin sefatgas specialmein meriteivlas per l'UCP, per il commerci ni per la professiun. Ellas san vegnir proponidas dalla suprastanza e nominadas dalla radunonza generala sco commembers d'honor. Ils commembers d'honor han ils medems dretgs sco ils commembers ordinaris, ein denton deliberai dalla contribuziun annuala.

**Art. 6**

L'annunzia per entrar ell'UCP ei d'inoltrar a scret alla suprastanza. La decisiun davart la recepciun da novs commembers cumpeta alla suprastanza. Instanza da recuors ei la radunonza generala. Ella decida definitivamein.

**Art. 7**

Il commembradi sesligia:

- a) entras declaronza d'extrada a scret. L'extrada sa succeder mo mintgamai sin la fin d'in onn da gestiun dall'UCP;
- b) entras partenza ord vischnaunca ni ord la regiun ni entras mort;
- c) entras exclusiun. In'exclusiun sa vegnir decidida dalla radunonza generala sin proposta dalla suprastanza.

Motivs per in'exclusiun dall'UCP ein en special donnegiaziun dall'uniun, nauscha cuntravenziun viers ils interess dil commerci ed inobservaziun dallas obligaziuns finanzialas enviers la UCP.

**II. Organisaziun****Art. 8**

Ils organs dall'UCP ein:

- a) la radunonza generala
- b) la suprastanza
- c) ils revisurs da quen
- d) il comite EX..

## A. La radunonza generala

### Art. 9

La radunonza generala ha liug mintgamai enteifer ils emprems quater meins digl onn. Radunonzas generalas extraordinarias san vegnir convocadas aschi savens che la suprastanza anfla ei per necessari. Ina radunonza generala extraordinaria sto vegnir convocada, aschinavon ch'in tschunavel da tuts commembers pretenda quei cun in'istanza fundada a scret alla suprastanza.

### Art. 10

En cumpetenzza dalla radunonza generala stattan:

- a) approvaziun dil protocol dalla radunonza generala;
- b) approvaziun dil rapport annual dil president;
- c) approvaziun dil quen annual e dil rapport dils revisurs;
- d) fixaziun dalla contribuziun annuala;
- e) elecziun dil president;
- f) elecziun dils ulteriurs commembers da suprastanza e dils revisurs da quen;
- g) exclusiun da commembers. Per in'exclusiun basegna ei il pli da 2/3 dils presents;
- h) nominaziun da commembers d'honor;
- i) tractaziun da recuors;
- j) decisiuns davart propostas che vegnan presentadas alla radunonza generala dalla suprastanza, dils revisurs da quen ni dils commembers;
- k) revisiun dils statuts;
- l) decisiun davart menar atras l'EX.;
- m) sligiaziun dall'UCP.

### Art. 11

L'invitaziun alla radunonza generala ha da succeder a scret silmeins 10 dis ordavon cun indicar la gliesta da tractandas. Mintga radunonza generala convocada conform als statuts ei cumpetenta da decider.

### Art. 12

Propostas da commembers per la tractaziun ella radunonza generala ein d'inoltrar a scret silmeins 20 dis avon la radunonza generala.

La radunonza generala astga decider mo davart fatschentas ch'ei tractandadas.

### Art. 13

Las elecziuns e votaziuns succedan cun maun pli. Elecziuns e votaziuns han da succeder cun scrutini aschinavon ch'in commember pretenda quei.

Tier elecziuns vala egl'empren scrutini igl'absolut pli, el secund scrutini il relativ pli dallas vuschs valeivlas. Damondas dil fatg vegnan concludidas entras la pluralitad dils commembers presents.

Tier paritad dallas vuschs decida tier elecziuns la sort e tier damondas dil fatg la vusch dil president.

Scadin commember present dall'UCP ha ina vusch.

## B. La suprastonza

### Art. 14

La suprastonza secumpona da 5–9 commembers: president, vicepresidente, actuar, cassier, e 1–5 assessurs.

Il cuoz d'uffeci dalla suprastonza munta a 2 onns. Ils commembers da suprastonza ein re-elegibels.

Cun excepziun dil president seconstituescha la suprastonza sesezza. Las singulas branschas duessan esser representadas commensuradamein.

Tier sedutas da suprastonza san commembers d'autoritads ed autras personalitads vegnir envidai tenor beinappreziar.

### Art. 15

La suprastonza diregia e representa l'UCP anoviars. En special ha ella las suandontas cumpetenzas ed obligaziuns:

- a) convocaziun dallas radunonzas generalas dall'UCP;
- b) execuziun dils conclus dalla radunonza generala;
- c) predeliberaziun da tuttas fatschentas per la radunonza generala e la liquidaziun dallas fatschentas ch'eiin buca resalvadas ad auters organs dall'UCP;
- d) preparaziun dil preventiv;
- e) recepziun da commembers novs;
- f) nominaziun da cumissiuns per la tractaziun e preparaziun da damondas specialas dil fatg;
- g) nominar ils delegai;
- h) tschercar commembers novs;
- i) relaschar in regulativ da spesas;
- j) l'administraziun dalla facultad dall'UCP;
- k) elecziun dil president e vicepresidente dil comite EX...

### Art. 16

Il president convochescha las sedutas da suprastonza, el meina las sedutas dalla suprastonza e dallas radunonzas generalas e representa l'UCP anoviars. El s'oblighescha da prender part silmeins ina ga ad onn alla radunonza dils presidents dallas uniuns da commerci.

Il vicepresidente surpren las funcziuns dil president sche quel ei impediud.

Igl actuar meina ils protocols dallas sedutas e radunonzas e liquidescha la correspondenza dall'UCP.

Il cassier meina il quen ed administrescha la cassa dall'uniun, meina il register da commembers ed administrescha la facultad dall'UCP. El obtegn per quellas incaricas la sottascripziun singula.

Il assessurs sorprendan funcziuns conform incaricas e decisiuns internas dalla suprastanza. Singulas funcziuns san vegnir messas ensemen ni surdadas ad in secretari che sto buca esser commember dalla suprastanza.

La sottascripziun legalmein valeivla per l'UCP meinan collectivamein il president, sch'el ei impedius il vicepresidente, mintgamai ensemen cugl actuar ni cassier.

#### **Art. 17**

La suprastanza seraduna aschi savens ch'il president anfla per necessari ni sche dus commembers dalla suprastanza pretendan quei, denton silmeins mintga quartal.

### **C. Ils revisurs da quen**

#### **Art. 18**

La radunonza generala elegia dus revisurs da quen cun in cuoz d'uffeci da dus onns.

Il revisurs da quen examineschan l'entira contabilitad dall'UCP e dall'EX.. e seperschuaden che la facultad documentada dall'UCP seigi avon maun. Il commembers dalla suprastanza ein obligai d'informar il revisurs da quen.

Il revisurs da quen suttamettan annualmein rapport e proposta a scret per mauns dalla radunonza generala.

### **D. Comite EX..**

#### **Art. 19**

Per l'organisaziun dall'EX.. seformescha in comite cun il diember necessari da commembers. President e vicepresidente dil comite vegnan elegi tenor art. 15 dalla suprastanza dall'UCP. Il dus elegi numnan il ulteriurs commembers dil comite. Quei comite resta en uffeci mintgamai entochen ch'il quen final ei vegnius approbaus dalla radunonza generala.

Incaricas, cumpetenzas ed indemnizaziuns dils commembers dil comite sedrezzan suenter in regulativ che vegn relaschus dalla suprastanza e che sa mintgamai vegnir adattaus allas pretensiuns ed als basegns specials per l'organisaziun dall'EX..

## IV. Tenercasa finanziel

### Art. 20

Il s mieds finanziels dall'UCP secumponan:

- a) da contribuziuns da commembers;
- b) da recavs da tscheins dalla facultad dall'UCP;
- c) d'avanzaments ord arranschaments;
- d) da donaziuns voluntarias ed autras entradas;
- e) facultad dall'EX...

### Art. 21

Sco onn da gestiun vala igl onn calendari.

La contribuziun annuala vegn fixada annualmein dalla radunonza generala sin proposta dalla suprastonza. Per arranschaments ed acziuns specialas sa la radunonza generala fixar contribuziuns specialas, aschinavon ch'ellas vegnan presentadas sin la gliesta da tractandas.

### Art. 22

Per las obligaziuns dall'UCP garantescha exclusivamein la facultad dall'uniun.

## III. Determinaziuns finalas

### Art. 23

La sligiaziun dall'UCP sa vegnir decidida mo entras ina decisiun dalla radunonza generala cun in pli da 2/3 dils commembers presents.

En cass d'ina sligiaziun decida la davosa radunonza generala davart la liquidaziun dalla facultad avon.

### Art. 24

Per ina revisiun dils statuts ei in conclus dalla radunonza generala cun in pli da 2/3 dils commembers presents necessari.

Quels statuts ein vegni approvai dalla radunonza generala dils 19 d'avrel 1997 cun la revisiun digl artechel 5, approvada dalla radunonza generala dils 31 da mars 2001 e passan immediat en vigur. Els remplazzan ils statuts dils 3 da matg 1984.

Il president: *Linus Fry*

La actua: *Renata Goldmann*

---